



## RE:SURGO

30 / 01 / 2015 | ARZ, JIL DANIEL

Roazhon adarre, war plasenn ar C'holombie, etre un toull-noz hag ur greizenn genwerzh prop ha trouzus : diskouezva L'Endroit, ul lec'h gouestlet d'ar mouladurioù arzel, skritelloù, fanzinoù, ha levrioù graet gant arzourien.

Ur wezh an amzer e vez staliet eno un diskouezadeg hag an taol-mañ zo bet kouviet ur c'houblad eus Berlin anvet Re:surgo.

Un nebeud deizioù a-raok digoradur an diskouezadeg ez eus bet kinniget ur prantad komz gante e skol an arzoù-kaer. Desket hon doa neuze o doa kroget o labour e-pad o yaouankiz dre sevel ur fanzin punk moulet gante e serigrafiezh gant dafar dastumet amañ hag ahont, dreist-holl e stal moullañ skol an arzoù kinklañ Strasbourg lec'h ma oant studierien.

E-pad bloavezhioù neuze o deus savet levrioùigoù schlag ha skritelloù evit strolladoù rock ha punk ar metoù damguzh su Alamagn ha reter Elzas. Tamm-ha-tamm koulskoude o deus klasket adnevesaat o labour ha peurvestroniañ o benveg moullañ. Ha setu int da voullañ levrioù evit arzourien all ha da zigeriñ un ti-embann.

E-pad ar bloavezhioù diwezhañ o deus kroget ivez da labourat e metoù di-sheñvel, re an arz a-vremañ. D'ar c'houlz-se o deus digoret ur lec'h nevez, hanter gwerzhva hanter diskouezva. Adalek ar mare-se o deus cheñchet o doare d'ober ha kroget da implij ar serigrafiezh d'ober oberennoù, etre unan ha pemp skouerenn dezho.

E L'endroit, neuze, e vez diskouezet lod eus o labourioù diwezhañ. Taolioù arnod bet graet gant o binviji moullañ lod geometrek, da welet evel taolennoù difetis, lod o vezañ luc'hskeudennoù o livioù adkempennet, lod c'hoazh tresadennoù nerzhus etre Baselitz ha Basquiat. Al levrioù, izel o friz ha kempennet brav, a zo da lakaat e-kreiz ho levraoueg personel evit adkavout anezhañ dre zegouezh ar wezh o tont pa vloc'h o klask testennoù Emil Mason, Tangi Malmanche pe Octave Mirbeau.

Ma faot deoc'h kregiñ da zastum oberennoù, daoust ma vez ral ar pezhioù aour en ho chakod, aze e kavoc'h peadra da vezañ kontant !